


ZANZIBAR MEMBINA KEMAJUANNYA



Al-Sayyid Khalīfah bin Ḥarab Sūlṭān

Zanzibar. Baginda telah menduduki takhta kerajaan selama 42 tahun. Bangunan yang tersergam hebat ialah istananya.



Pada 9 September akan datang, Sultan Zanzibar, al-Sayyid Khalīfah bin Ḥarab akan meraikan hari ulang tahunnya yang keempat puluh dua menduduki takhta kerajaan.

Zanzibar tidak begitu terkenal kepada orang-orang kita di sini padahal pulau itu mempunyai sejarah gemilang dan sekarang terkenal sebagai pulau yang mengeluarkan lada hitam dan rempah-rempah yang tidak bertolok banding di dunia.

Pemerintahan Zanzibar terdiri daripada dua buah pulau: Zanzibar dan Bamsa. luasnya 1020 persegi batu. Penduduknya berjumlah 269 ribu dari orang-orang Afrika, Arab dan India. Elok juga disebut, Zanzibar pada masa dahulu tertakluk kepada Sūlṭān Musqāt dan ‘Omān. Dalam kurun yang ketujuh belas Portugis menakluk pulau itu tetapi pada tahun 1730 Sūlṭān Musqāt berjaya mengusir mereka

dan menawan beberapa wilayah di pantai timur Afrika.

Pada tahun 1861 pulau itu telah berpecah daripada Musqāt dan semenjak itu menjadilah dia pusat perusahaan tanaman lada hitam dan rempah yang terutama di dunia kerana sultannya yang jauh pandangan telah memaksa rakyatnya menanam benda-benda itu. Hasil lada hitam dan rempah-rempah yang telah dikeluarkan dalam tahun 1951 berjumlah £3, 200, 000 Sterling, selain daripada jumlah besar gading-gading gajah yang dikeluarkan pada tiap-tiap tahun.

Tidak berapa lama dahulu perusahaan menanam benda-benda makanan telah dijalankan dengan luasnya di dalam kedua-dua buah pulau itu untuk mencukupi keperluannya seperti: padi, sekoi, kurma, limau nipis, pisang dan tembakau. Kebun-kebun percubaan menurut cara baharu telah dibuka di sana sini. Demikian juga kerajaan Zanzibar telah mengambil berat tentang kesihatan dan pelajaran.

Pelabuhan Zanzibar sentiasa penuh dengan kapal-kapal yang mengangkut barang-barang perniagaan dan hasil-hasil tanaman-tanaman ke pelabuhan Laut Merah dan Teluk Parsi, sebagaimana juga berlabuh di dalamnya kapal-kapal besar dalam perjalanan ke Terusan Suez, India, Pakistan, Afrika Selatan dan Timur Jauh. Di Zanzibar juga ada perhentian-perhentian terbang awam.

Meskipun udara di Zanzibar terlalu panas, tetapi hasil tanaman-tanaman, gerakan kemajuan dan kemakmuran yang faedahnya akan terpulang kepada rakyat jelata sedang berjalan dengan baik dan menggirangkan. Zanzibar sedang aman damai dan penduduknya masing-masing mengerjakan kerja-kerja yang berfaedah dan menambahkan hasil mereka. Benar perkhidmatan-perkhidmatan kesihatan dan masyarakat belum mencapai kedudukan yang sempurna dan masyarakat belum mencapai kedudukan yang sempurna tetapi sedang bertambah maju dari setahun ke setahun dan perbelanjaan yang telah ditentukan kerananya makin bertambah.



Tayar-tayar motokar? Bukan. Ini ialah daun tembakau tanaman Zanzibar yang telah dijalin seperti bentuk tayar untuk dihantar ke luar negeri.

Pada masa yang akhir ini hal ehwal penduduk makin bertambah baik. Adalah sentiasa diharapkan supaya kedudukan yang baik itu berkekalan terus menerus bukan sahaja mengenai perkhidmatan-perkhidmatan yang disebutkan itu tetapi meliputi hasil. Pengeluaran tanaman-tanaman dan perusahaan-perusahaan tempatan yang berguna dan menambahkan mata pencarian penduduk serta menjadikan mereka tidak bergantung kepada negeri lain.

Kesimpulannya meskipun belum dapat mencapai kemajuan yang sempurna dalam segala lapangan hidup tetapi tak dapat disangkal Zanzibar sedang bergerak ke arah itu semenjak beberapa tahun yang lalu.

Akan Terbit!

Sedikit Hari Lagi!!

Umar Ibnu al-Khaṭṭāb

(4 Penggal Tamat)



Lada hitam ialah tanaman Zanzibar yang utama. 80 peratus yang dikeluarkan oleh dunia adalah datangnya dari Zanzibar.